

dad ava tгода antras energiea solara vign sustigneida cun 3 600.– fr. e schi dat anc en sustign ve digl scaldamaint dattigl anc 8 500.– fr. Tar en provedimaint dad energiea convenziunal dattigl en potenzial da spargn ad onn da 1 200.– fr.

Tar en indrez solar segl tetg u schiglio ensanouas è igl ewz obliia da surpiglier igl current electric ainten la sia reit. Per igl possessor digl indrez solar è igl chint dètg simpel, numnadamaintg igl agen basigns dad energiea minus la producziun dat la differenza per bagn u per mal.

An general ègl uschia tgi igl sustign da promoziun pauschal digl ewz è pi ot per indrezs pi pitschens. Cun ena producziun annuala dad anfignen 10 kWp dattigl 3 000.– fr. sustign, da 10 – 20 kWp ègl 1 500.– fr. e per indrezs anc pi gronds dattigl en chint individual.

Grond potenzial da sanaziun

James Cristallo e Michael Zuchwert dall'interpresa Uffer SA on tematiso la sanaziun da bietgs existents. 60% dallas tgesas d'abitatar an Svizra seian erigeidas avant igl 1979 e seian grondas sfarlata-dras d'energiea. Cun ena sanaziun professionala seia avant mang en potenzial da spagner energiea dad anfignen 73%. Igl pi fitg geia a perder antras igls schlers, igl tetg e las fastschedas dalla tgesa. Chegl seian ca. 75%. Cun far ena sanaziun ins vigna da migliorare 20% cun midar/sanar igls indrezs tecnics scu scaldamaint etc. ed alloura per 60% cun sanar las fatschedas digl bietg.

Ena tgesa tgi è neida biageida anc avant 30 onns duvrava per m² d'abitatar ca. 18 l ieli ad onn. Oz dovra ena tgesa da standard minergia-P anc 3 l per m³. Detg oter: cun ena sanaziun energetica ins vign da redutgier tar ena tgesa tgi duvrava 3 500 l ad onn giu tar 700 l.

Cantun e confederaziun sustignan anc talas sanaziuns cun 30.– fr./m² tar l'isolaziun dafora e 10.– fr./m² tar ena isolaziun interna.

Per ena sanaziun cumpletta tar ena tgesa viglia ins vegia da chintar cun costs da ca. 148 000.– fr. E scu subvenziuns ins dastga spitgier 13% u 24 000.– fr. Ed ossa seia la dumonda, schi vala la pagna da far ena sanaziun totala. Magari ins saptga contanscher cun ena sanaziun parziala tgi costa blier pi pac gio ena reducziun d'energiea da 50–70%.

NATHEIRA

En oter urs è nia sur Gelgia

Igl urs, noua è' l igl urs da Beiva?



Interess è el pero musso pigl compost tar chella tgesa a Tgavretga Tua.

● **pb. Dantant tgi igl urs M13 sainza tema è gia ena collisiun cun la Veiadafier retica ed è demolito igl emettour GPS, è en oter urs nia no sur Gelgia. A Beiva è el anc piglia da part en compost e siva ins è ni via ni santia ple ensatge dad el.**

Igl urs tgi ins veva er gio fistizo segl pass digl Furn ed ins canoscha betg la sia idenditad è rivo avant bung en'emda a Zernez. Lò veva el visito en aviouler. Siva è el pero sa mess sen en viadi pi lung ed el pareva dad aveir mecta prescha. Da Zernez è el ia vers S-chanf, lò dalla Val Bever veadaint se da Tranter Ovas e rivo sen la Fuorcla d'Agnel sen 3000 m sur mar. Siva è el mido direcziun vers la Val Güglia anfignen giu l'alp Güglia tgi è gist pac da l'oter mang digl pass. Lò ins è catto tgiadeiras, è rimno ellas e tarmess aint per survagneir la sia indetificaziun.

Angiu u anve?

Anfignen cò ins veva er savia persequitar igl urs segls fastezs ainten la neiv. Digl pass digl Gelgia è igl urs ia an direcziun Tgavretga. Essend tgi el veva gia gronda prescha da neir da Nagiadegna no an Surses e veva fatg en viadi relati-

vamaintg lung, ins pansava tgi el seia ainten la fom. Pero è el passo ainten la Tgavretga en uigl cun aint nursas tgi era bagn saro giu cun ena seiv da giatter, ma tgi fiss betg sto schi grev da romper aint. El para da betg aveir gia grond interess ed è ia anavant. A Tgavretga Tua è el alloura passo la tgesa da Jakob Strebel. Sur tgesa era en compost tgi el è disfatg e varo gist dusto la neira. Grondas è el pero betg fatg ed è ia anavant an direcziun Beiva. Alla fegn d'emda pasada èn igls sies fastezs sa pers sen igl taragn. E siva da chegl ègl nign tgi n'ò via ni santia el. Er davart dalla populaziun èn neidas nignas annunzgas tgi igl urs vess fatg ensanouas donn.

Damais è ossa igl taimp dallas speculaziuns, noua tgi igl urs pudes esser. E cò dattigl las pi diversas teorias. Tgi manegia tgi el seia tgunsch ia puspe anavos an direcziun Nagiadegna cun l'intenziun da leir turnar lò noua tgi igl conturn è ad el ancunaschaint. Alloura ins vess pero stuia cattar ensanouas festezs ins metta ancunter a chella teoria. Oters èn persvadias tgi el seia anc an Surses, tgunsch ia pi angiu per la val. En urs so gio suarar cadavers sen ples kilometers. E schi el vegia

forsa catto ena selvaschigna capita, schi vegia el pigl mument dusto la fom. Ed ossa seian er avant mang ervas e frastgas tgi el saptga sa nutreir. Schi el seia anc d'anturn vigna el a sa mussar ensanouas.

Betg schi dumesti

Igl urs tgi vign damais digl Tirol digl sid è pero anc nia vasia da nign ed el ontga tant scu pussebel igls carstgangs. Damais betg en urs «maltratg» scu JJ3 tgi è passanto la stad 2007 ainten la nossa regiun ed igl anvien 2007/08 se sur Alvagni aint igl gôt. Lez veva survagnia en emettour, uschia tgi ins saveva survigilar las sias rutas. El era savens ainten igls abitadis e sblundrageva igl rusment. Ins veva spero tgi el midess siva digl pôss d'anvieni las sias «manieras». Chegl è pero betg sto igl cass. El è ia anavant vers las zonas abidades per cattar ensartge damagler. Ins è declaro el scu «urs da problem» ed igls 14 d'avregl 2008 è el nia sagetto agl manevèl digl «Glaspass».

E cun M13 parigl dad esser sumigliant. Er el para da leir tschartger la sia vivonda pitost alla vashinanza digl carstgang e glez è simplamaintg problematic.